

藏

書

藏書親臣傳卷五十六

○公主

○太宗荆國賢公主

宋太宗嘗發寶藏令諸女自擇主獨無取真宗卽位主嫁駙馬都尉李遵勗舊制尚主者降其父爲兄弟行時遵勗父繼昌生日主請以舅禮謁遵勗賓客多一時名士每燕集主皆親視饗膳嘗有盜入主第帝命有司訊捕主請出所逮繫人而自以私錢募告者乃得真盜後居夫喪衰麻未嘗去體服除便不服華

麗一日燕禁中帝親爲簪花主辭曰自誓不復爲此
矣善筆札喜圖史能爲歌詩尤善女紅及病目帝親
爲之舐左右皆感泣帝亦悲慟曰先帝伯仲之籍十
有四人今獨存大主奈何遽有斯疾乎遵勗亦賢駙
馬也主下嫁而所居堂瓦甍多爲龍鳳遵勗令鑊
去之天聖間章獻太后問曰外間亦有何言遵勗不
荅太后固問之對曰臣無他聞但聞言天子旣冠太
后宜以時還政耳太后曰我非戀此但帝少內侍多
恐未能制之也勗師楊億爲文億卒爲制服又與劉

錫友善。劬卒，厚存恤其家。蓋勗深通性命之學，大
年知之。他儒者未必知也。

○武氏太平權略公主

太平公主，武氏所生也。儀鳳中，吐蕃請主下嫁，主乃
築真宮如方士薰戒以拒。和親久之，主衣紫袍玉帶，
折上巾，具紛礪，歌舞帝前。帝及后大笑曰：「兒不爲武
官，何遽爾？」主曰：「以賜駙馬可乎？」帝識其意，擇薛紹尚
之。紹死，更嫁武承嗣。會承嗣小疾，罷婚。后乃殺武攸
暨妻以配主。主多陰謀，后嘗謂類我，而主內與謀外。

實檢畏故終后世無他訾。玄宗將誅韋氏，主與秘計。事定，將立相王。衆未敢發，主欲自以爲功，乃入見。少帝曰：「天下事歸相王，此非兒坐乃掖下取乘輿服進。」睿宗、睿宗卽位，主權由此震。朝廷大政事，非關決不下。間不朝，則宰相就第咨判。天子畫可而已。玄宗以太子監國，使宋王岐王摠禁兵。主怒太子分其權，乘輦至光範門，召宰相白廢太子。於是宋璟、姚元之皆恐，請出主東都。帝不許，但詔主居蒲州。主大失望。太子懼，奏斥元之以銷戢怨嫌。主居外凡四月。太子

復表請還京時宰相七人五出主門下主內忌太子英明而以宰相皆其黨遂有逆謀太子知之乃召岐王薛王及兵部尚書郭元振將軍王毛仲少監姜皎侍郎王琚崔日用及內侍高力士等定策共誅之初王琚預於王同皎之謀亡命傭書於江都上之爲太子也琚還長安選補諸暨主簿過謝太子琚至廷中故徐行高視宦者曰殿下在內簾琚曰何謂殿下當今獨有太平公主耳太子遽召見與語琚曰韋庶人弑逆人心不服誅之易耳太平公主凶猾無比而大

臣多爲之用。琚竊憂之。太子泣曰。主上同氣。惟有大平言之。恐傷其意。不言爲患日深。奈何。琚曰。天子之孝。異於匹夫。蓋主漢昭帝之妹。自幼供養。有罪猶誅。太子悅。乃奏爲詹事府司直。及卽位。以爲中書侍郎。至是。聞主有逆謀。琚遂言曰。事迫矣。不可不速發。左丞張說亦遣人遺上佩刀。欲上自割斷。荊州長史崔日用入奏事。言曰。太平謀逆有日。陛下在東宮時。討之。須用謀力。今旣光臨大寶。但下制書。則誰敢不從。秋七月。魏知古告公主欲以是月四日作亂。上乃先

發初上在東宮時楊后入宮爲良媛太平多忌而宮中左右持兩端纖悉必聞媛方娠帝密語張說曰用事者不欲吾生子奈何因命說挾劑以入而自於曲室煮之上夢若有介而戈者環鼎三而三煮盡覆以告說說曰天命也乃止生男是爲肅宗

○中宗安樂淫縱公主

安樂公主中宗最幼女也嫁武三思子崇訓好貨光艷動天下嘗自作詔箱其前請帝署可帝笑從之又請爲皇太女與太平等七公主皆開府而主府官屬尤甚

皆降墨敕斜封授官。故號斜封官。又請昆明池爲私沼。不許乃自鑿定。昆池言欲以抗訂之也。崇訓歿。主素與武延秀亂。卽嫁之。臨淄王誅韋庶人。主方覽鏡作眉。聞亂走至右延明門。兵及之。斬其首。

○列女附

○桓少君

桓少君。勃海鮑宣妻也。宣嘗就少君父學。父奇其清苦。故以女妻之。裝送資賄甚盛。宣謂其妻曰。少君生當騎習美飾。而吾實貧賤。不敢當禮。妻曰。大人以先

生修德守約故使賤妾侍執巾櫛既奉承君子懷
是聽乃悉歸侍御服飾更著短布裳與宣共挽鹿車
歸鄉里拜姑禮異提甕出汲修行婦道宣哀帝時官
至司隸校尉子永中興初爲魯郡太守永子昱從容
問少君曰太夫人寧復識挽鹿車時不對曰先姑有
言存不忘亡安不忘危吾焉敢忘乎

○王霸妻

太原王霸妻者不知何氏之女也霸少立高節光武
時連徵不仕初霸與同郡令狐子伯爲友後子伯爲

楚相而其子爲郡功曹子伯令其子來致書車馬服從雍容如也霸子時方耕於野聞賓至投耒而歸見令狐子沮怍不能仰視霸目之有愧容客去而臥久不起妻怪之霸曰吾與子伯素不相若向見其子容服甚光舉措有適而我兒曹蓬髮歷齒未知禮則見客而有慙色父子恩深不覺自失耳妻曰君少修清節不顧榮祿今子伯之貴孰與君之高奈何忘宿志而慚兒女子乎霸屈起而笑曰有是哉遂共終身隱

遯

○姜詩妻龐氏

廣漢姜詩妻者同郡龐盛之女也詩事母至孝母好飲江水水去舍六七里妻常泝流而汲後值風不時得還詩見母渴責妻而遣之妻乃寄止鄰舍晝夜紡績市珍羞使鄰母時時以意自遺其姑久之姑怪之鄰母具以對姑感而慙乃卽呼還詩有子後因遠汲溺失妻恐姑哀傷不敢言而託以行學一時不在姑嗜魚鱸又不能獨食夫婦常力作供鱸呼鄰母共之舍側忽有湧泉味如江水每旦輒出雙鯉常以供二

母之膳。後赤眉賊經詩里。弛兵而過。曰。驚大孝。必觸鬼神。以故比落蒙其安全焉。永平三年。舉孝廉。顯宗詔曰。大孝入朝。凡諸舉者。一聽平之。由是皆拜郎中。

○班姬

扶風曹世叔妻者。同郡班彪之女也。名昭。字惠班。一名姬。博學高才。世叔早卒。兄固著漢書。其八表及天文志未及竟而卒。和帝詔昭就東觀藏書閣踵而成之。數召入宮。令皇后諸貴人師事焉。號曰大家。每有貢獻異物。輒詔大家作賦頌。時漢書始出。多未能通。

者同郡馬融伏於閣下從昭受讀昭作女誡七篇其
辭曰鄙人愚暗受性不敏蒙先君之餘寵賴母師之
典訓年十有四執箕箒於曹氏于今四十餘載矣戰
戰兢兢常懼黜辱以增父母之羞而今而後乃知免
耳男能自謀矣吾不復以爲憂也但傷諸女方當適
人而不漸訓誨不聞婦禮懼失容它門取恥宗族間
作女誡七章願諸女各寫一通庶有補益裨助汝身
去矣其勗勉之卑弱第一古者生女三日臥之牀下
弄之瓦塼而齋告焉臥之牀下明其卑弱主下人也

弄之瓦墼、明其習勞、主執勤也。齋告先君、明當主繼
祭祀也。三者苟備、而患名稱之不聞、黜辱之在身、未
之見也。夫婦第二。察今之君子、徒知妻婦之不可不
御、威儀之不可不整、故訓其男、檢以書傳、殊不知夫
主之不可不事、禮義之不可不存、但教男而不教女、
不亦蔽於彼此之數乎。敬慎第三。鄙諺云、生男如狼、
猶恐其虺、生女如鼠、猶恐其虎。故曰、敬順之道、婦之
大禮也。夫婦之好、終身不離、房室周旋、遂生嫖黷、
黷既生、語言過矣。語言既過、縱恣必作。縱恣既作、則

侮夫之心生矣。夫事有曲直。言有是非。直者不能不爭。曲者不能不訟。訟爭既施。則有忿怒之事矣。侮夫不節。譴呵從之。忿怒不止。楚撻從之。夫爲夫婦者。義以和親。恩以好合。楚撻既行。何義之存。譴呵既宣。何恩之有。恩義俱廢。夫婦離矣。婦行第四。女有四行。一曰婦德。二曰婦言。三曰婦容。四曰婦功。夫云婦德。不必才明絕異也。婦言。不必辯口利辭也。婦容。不必顏色美麗也。婦功。不必功巧過人也。專心第五。禮。夫有再娶之義。婦無二適之文。故曰。夫者。天也。天固不可

逃夫固不可離也。故女憲曰：得意一人是謂永畢。失意一人是謂永訖。由斯言之，夫不可不求其心也。曲從第六夫物，有以恩自離者，亦有以義自破者也。夫雖云愛舅姑，云非此所謂以義自破者也。然則姑云不爾而是固宜從令，姑云爾而非猶宜順命，此則所謂曲從矣。故女憲曰：婦如影響焉，不可賞和叔妹第七。婦人之得意於夫主，由舅姑之愛已也。舅姑之愛已，由叔妹之譽已也。由此言之，我臧否譽毀一由叔妹，知叔妹之不可失而不能和之，以求親其蔽也哉。

馬融善之、令妻子習焉、昭
有妹曹豐生、亦有才惠、
書以難之、辭有可觀、昭年
七十餘卒、皇太后素服舉
哀、使者監護喪事、所著賦、
銘、誄、問、注、哀辭、書、論、上
疏、遺令、凡十六篇、子婦丁、
公爲撰集之、又作大家讀
焉、

○樂羊子妻

河南樂羊子、嘗行路得遺金一餅、還以與妻、妻曰、妾
聞志士不飲盜泉之水、廉者不受嗟來之食、況拾遺
求利乎、羊子大慙、乃捐金於野、而遠尋、謝、二年來歸、

妻問其故。羊子曰：「久行懷思，無他異也。」妻乃引刀趨機而言曰：「此織生自蠶繭，成於機杼，一絲而累以至於寸，累寸不已，遂成丈匹。今若斷斯織也，則絹失成，功稽廢時。日，天子積學，當此知其所止，以就懿德者，中道而歸，何異斷斯織乎？」羊子感其言，復還終業，七年不返。

○李穆姜

穆姜，漢中陳文矩妻也。有二男，而前妻四子，文矩為安衆令，喪於官。四子以母非所生，稍毀，因積而為妻。

慈愛益隆衣食資供倍於所生及前妻長子興遇疾困篤穆姜親調藥膳因心情逾至興疾久而瘳呼三弟謂之曰繼母慈仁出自天性吾兄弟不識恩養禽獸其心雖母道益隆我輩過惡亦已深矣遂將三弟詣南鄭獄陳母之德狀已之過乞就刑辟於是縣言之郡郡守表異其母蠲其家徭穆姜年至八十餘乃終

○孝女曹娥

孝女曹娥者會稽上虞人也父盱能絃歌爲巫祝漢安三年五月五日於縣江泝濤迎婆婆娑神溺歿屍不

得娥年十四沿江號哭晝夜不絕乃投瓜於江祝曰
父屍所在瓜當沉旬有七日隨流至一處而瓜沉娥
遂投江而死至元嘉元年縣長度尚改葬娥于江南
立碑于道左會稽典錄曰上虞長度尚有弟子邯鄲
淳者字子禮弱冠有異不尚先使魏朗作曹娥碑文
成未出會子禮至因試使爲之子禮操筆立成無所
點定朗嗟嘆不暇遂毀吳草而勒子禮之文於碑所
謂黃絹幼婦外孫荃白者也

○龐消母趙娥

酒泉龐消母字娥姓趙父爲同縣人所殺而娥兄弟三人俱病故雙喜面白賀以爲莫已報也娥陰懷憾憤潛備刀兵常帷車以候讐家積十餘年不能得後卒遇讐於都亭娥卽刺殺之而詣縣自首曰父讐已報請就刑戮福祿長尹嘉義之欲與解罪娥不肖曰怨塞身歿妾之明分結罪理獄君之常理何敢苟生以枉公法乎自入於獄遇赦得免

○皇甫規妻

安定皇甫規妻者規更娶之妻也善屬文能草書規

卒時妻年猶盛而容色甚美董卓娉以輶輜乘馬奴婢錢帛充路妻輕服詣卓門跪自陳請辭甚酸愴卓使傅奴侍者悉拔刀圍之而謂曰孤之威教欲令四海風靡何有不行於一婦人乎妻知不免乃立罵卓曰君羌胡之種毒害天下猶未足邪妾之先人清德奕世皇甫氏文武上才爲漢忠臣君親非其趣使姦吏乎敢欲行非禮於爾君夫人邪卓乃引車庭中以其頭懸輓鞭撲交下妻謂持杖者曰何不重乎速盡爲惠遂从車下後人圖畫其像號之曰禮宗云

○陰瑜妻荀采

南陽陰瑜妻者、潁川荀爽之女也、名采、年十七適陰氏、十九產一女、而瑜卒、後同郡郭奕喪妻、奕以采許之、爽因詐稱病篤、召采、采懷刀自誓、爽令傅婢執奪其刀、扶抱載之、勅衛甚嚴、女既到、郭氏乃僞爲歡悅之色、謂左右曰、我本立志與陰氏同穴、而不免逼迫、遂至於此、素情不遂、奈何、乃命建四燈、盛裝飾、請奕入、相見、共談、言辭不輟、奕敬憚之、遂不敢逼、至曙而出、采因勅令左右辨浴、既入室而掩戶、以粉書屏上、

日尸還陰陰字未成而自縊左右初不爲意此視之氣已絕矣

○孝女叔先雄

孝女叔先雄者犍爲人也父泥和爲縣功曹縣長遣謁巴郡太守泥和乘船墮于湍水尸喪不歸雄感念怨痛晝夜號泣所生男女二人並數歲雄乃各作囊盛珠環以繫兒而自乘小船於父墮處慟哭自投水死其夕弟賢夢雄告曰却後六日當與父同出至期伺之果與父相持浮于江上

○晉羊耽妻辛氏

辛氏字憲英魏侍中毗之女也弟敞爲大將軍曹爽
參軍宣帝將誅爽因其從魏帝出而閉城門敞懼問
憲英曰天子在外太傅閉城門人云將不利國家於
事可得爾乎憲英曰事有不可知然以吾度之太傅
殆不可不爾明皇帝臨崩曹爽與太傅俱受寄託而
爽獨專權勢於王室不忠於人道不直此舉不過以
誅蔡耳敞曰然則敞無出乎憲英曰安可以不出凡
人在難猶或借之爲人執鞭而棄其事不祥也且爲

人任爲人死親昵之職也汝從衆而已敝遂出宣帝
果誅爽事定後敝歎曰吾不謀於姊幾不獲於義其
後鍾會爲鎮西將軍憲英謂耽從子祐曰鍾士季何
故西出祐曰將以滅蜀也憲英曰會在事縱恣非持
久處下之道吾畏其有他志也及會將行請其子琇
爲參軍憲英憂之曰他日吾爲國憂今日吾家難至
矣琇固請於文帝帝不聽憲英謂琇曰行矣戒之古
之君子入則致孝於親出則致節於國在職思其所
司在義思其所立不遺父母憂患而已軍旅之間可

以濟者其唯仁恕乎。會至蜀果友琇果全歸。

○洗氏夫人

隋譙國夫人洗氏者高涼人也。世爲南越首領部落。十餘萬家。夫人幼賢明。在父母家。已能撫循部衆。行軍用師。壓服諸越矣。梁大同初。羅州刺史馮融爲其子高涼太守。寶聘以爲妻。融本北燕苗裔。大父業以三百人浮海歸宋。因畱新會自業。及融三世爲守牧。他鄉羈旅。號令不行。至夫人誠約本宗。使從百姓禮。每與夫寶參決辭訟。首領有犯法者。雖親族無所縱。

捨自此政令有序人莫敢違後遇侯景反高州刺史
李遷仕據大臯口遣召寶夫人疑其反止之數日遷
仕果反遣主帥杜平虜率兵入瀨石夫人曰平虜入
瀨與官兵相拒勢未得還遷仕在州無能爲也宐遣
使詐之云身未敢出欲遣婦往參彼必無防我將千
餘人步擔雜物唱言輸貳得至柵下賊可圖也寶從
之遷仕大喜果不設備夫人因而擊之大敗遷仕遂
總其兵與陳霸先會於瀨石還謂寶曰陳都督極得
衆心必能平賊君宐厚資給之及寶卒嶺表大亂夫

人懷集。日越數州。宴然後廣州刺史歐陽訖謀反。召其子僕至南海。誘與爲亂。僕遣使歸告夫人。夫人曰。我不能惜汝。負國遂發兵拒境。訖徒潰散。僕以夫人之功。封信都侯。至德中。僕卒。陳國亡。嶺南未有所附。數部三奉夫人號爲聖母。隋文帝遣摠管韋洸安撫嶺外。夫人遣其孫暄帥衆迎洸。未幾番禺人王仲宣反。圍洸。夫人遣其孫暄帥師援之。時暄與逆黨陳佛智相友善。故遲留不進。夫人大怒。遣使執暄。係州獄。又遣孫盎討佛智。斬之。進兵至南海。敗仲宣。夫人親

被甲乘介馬張錦傘領毅騎衛卒使裴矩巡撫諸州其蒼梧首領等皆來叅謁還令統其部落嶺南悉定帝拜盎爲高州刺史封洗氏譙國夫人降敕書褒美賜物五千段皇后以首飾及宴服一襲賜之時番禺州總管趙訥貪虐諸狸獠多亡叛者夫人遣長史上封事論安撫之宜并言訥臯狀上遣推訥得其贓竟致於法敕委夫人招慰亡叛夫人親載詔書自稱使者歷十餘州宣述上意諭諸狸獠所至皆降文帝賜夫人臨振縣湯沐邑一千五百戶仁壽初卒謚爲誠敬

藏書近臣傳卷五十七

○宦官一

○正直中官呂強

呂強少以宦者爲小黃門。再遷中常侍。靈帝時例封宦者以強爲都鄉侯。強辭讓。再四因上䟽陳事曰。伏聞中常侍曹節等。讒諂媚主。佞邪徼寵。放毒人物。疾妬忠良。陛下不悟。妄授茅土。又并及家人。重金兼紫。相繼爲蕃輔。臣誠知封事已行。言之無益。所以冒死陳愚忠者。願陛下損改旣謬。從此一止耳。臣又聞前

召議郎蔡邕對問於金商門而令中常侍曹節王甫等喻以詔書令其極對邕承旨毀刺貴臣譏呵豎宦陛下不密其言至令宣露羣邪項領膏唇拭舌競欲咀嚼致邕極罪室家遠徙老幼流離是令羣臣皆以邕爲戒不敢復盡忠言也故太尉段熲武勇冠世習於邊事垂髮服戎功成皓首歷事二主勲烈獨昭而爲司隸校尉陽球所誣一身旣斃妻子遠播天下惆悵功臣失望臣謂宜更徵邕授任反類家屬則忠貞路闢衆怨以弭帝不聽時帝作列肆於後宮使諸綵

女販賣更相盜竊爭鬪帝著商賈服從之飲宴爲樂
又駕四驢躬自操轡京師轉相倣效驢價遂與馬齊
又爲私藏收天下之珍每郡國貢獻先輸中署名爲
導行費強復上䟽諫曰天下之財莫不生之陰陽歸
之陛下歸之陛下豈有公私而今中尚方歛諸郡之
寶中御府積天下之繒西園引司農之藏中廐聚太
僕之馬而所輸之府輒有導行之財調廣民困費多
獻少奸吏因其利百姓受其敝願陛下詳思臣言書
奏亦不省中平元年帝見黃巾賊起乃召問強所宜

施行強言宜先誅左右貪濁者大赦黨人料簡刺史二千石能否帝納之先赦諸黨人於是諸常侍人人求退又各徵還宗親子弟在州郡者然中常侍趙忠夏惲等遂亦怨強入骨矣於是遂共搆強與黨人共訕議朝政數讀霍光廢昌邑王傳帝不悅使中黃門持兵召強強聞召怒曰吾死亂至矣丈夫盡忠國家安能對獄吏遂自殺時宦者濟陰丁肅下邳徐衍南陽郭耽汝陽李巡北海趙祐等五人並清謹退在里巷不爭威權又小黃門甘陵吳伉善爲風角博達有

奉公之稱，知不得用，常託別處，還寺舍以自養。

○小心內侍高力士

聖曆初，嶺南討擊使上二回兒，曰金剛，曰力士。武后以其強悟，敕給事左右。後从累逐出，中人高延福養以爲子。因善武三思，歲餘猶入禁中。玄宗在藩，力士傾心歸附。已平韋氏，乃擢內給事。初，太宗定制，內侍省不置三品官。黃衣廩食，守門傳命而已。中宗時，七品以上至千餘人。然衣緋者尚寡。是後宦官增至三千人。除三品將軍者寔多。至力士則四方奏請皆令

先省後進小事卽專決雖洗沐未嘗出帝曰力士在我寢乃安當是時宇文融李林甫韋堅楊慎矜楊國忠安祿山高仙芝等雖以才寵進然皆厚結力士以相扶助肅宗在東宮兄事力士他王公主盡呼力士爲翁帝或不名力士而呼將軍始李林甫牛仙客知帝憚幸東都而京師漕不給乃以賦粟助漕及用和糴法數年國用稍充帝謂力士曰我不出長安且十年海內無事朕將以天下事付林甫若何力士對曰天子順動古制也且稅入有常則人不告勞今賦粟

充漕臣恐國無旬月蓄糴不止則私藏竭又天下柄
不可假人威權旣振孰敢議者帝不悅力士頓首自
陳心狂易語謬當死及帝走蜀力士從帝進齊國公
肅宗卽位靈武帝聞而喜曰吾兒應天順人改元至
德不忘孝也尚何憂力士曰兩京失守生人流亡河
南漢北盡爲戰區天下痛心而陛下以爲何憂臣不
敢聞命後從玄宗還京玄宗徙西內居十日爲李輔
國所譖肅宗信之除籍長流巫州巫州地多薺而不
食力士因感而詠曰兩京秤斤賣五谿無人採夷夏

雖不同氣味終不改實應元年赦還見二帝遺詔北
向哭嘔血而卒年七十九初太子瑛旣廢武惠妃方
寵李林甫等皆屬壽王帝以肅宗長欲立之而未決
居常忽忽不食力士曰大家不食豈膳羞不具邪帝
曰爾我家老奴揣我意何爲力士曰豈以嗣君未定
邪推長而立孰敢爭者帝曰是也儲位遂定天寶中
邊將爭立功以邀賞帝嘗曰朕春秋高矣朝廷細務
付宰相蕃夷不襲付諸將寧不自暇逸乎力士對曰
臣間至閣門見奏事者言雲南數喪師又北兵悍且

臣恐禍成不可禁遏。帝曰：卿勿言，朕將圖之。十三年秋大雨，力士曰：自陛下以權假宰相，法令不行，陰陽失度，天下事庸可復安平？帝不荅。明年而祿山反。

○忠謹中官馬存亮嚴遵美

馬存亮元和時累擢知內侍省事。敬宗初，染署工張韶與卜者蘇玄明謀爲變。帝大驚，遽幸左軍。存亮出迎，捧帝足，涕泣自負，遣左神策大將軍康瑨全右。策大將軍康志睦率騎兵討賊，韶及玄明殺之，賜存亮實封戶二百。存亮一時功最高，乃推委權勢，求

監淮南軍太和中致仕封岐國公卒存亮遠事德宗更六朝資性畏慎始去禁衛衆皆感泣唐世中官以忠謹稱者唯存亮及西門季玄嚴遵美三人而已遵美父季寔爲掖廷局博士大中時有宮人謀弑宣宗是夜季寔直咸寧門下聞變入射殺之遵美歷左軍容使嘗歎曰北司供奉官以勝衫給事今執笏過矣後從昭宗遷鳳翔求致仕隱青城山年八十餘卒

○忠節中官張承業

張承業穆宗時宦者也昭宗爲茂貞所迫將出奔太

原先遣承業使晉因以爲河東監軍其後臣胤誅宦
官在外者悉詔所在殺之晉王李克用憐承業匿之
斛律寺及晉王病革以莊宗屬承業曰以亞子累公
莊宗兄事承業甚親重之莊宗在魏與梁戰河上十
餘年軍國之事皆委承業凡畜積金粟收市兵馬勸
課農桑而成莊宗之業者多承業之功莊宗歲時自
魏歸省須錢蒲博而承業主藏錢不可得莊宗乃置
酒庫中酒酣使其子繼岌爲承業起舞舞罷承業出
寶帶幣馬以贈莊宗指錢積語承業曰和哥乏錢可

與錢一積何用帶馬爲和哥繼及小字也承業謝曰
國家之錢臣不得私莊宗語侵承業承業怒曰臣老
敕使豈爲子孫計耶惜此庫錢欲佐王成霸業爾王
若欲用何必問臣財盡兵散豈獨臣受禍也莊宗顧
元行欽曰取劍來承業起持莊宗衣而泣曰臣受先
王顧託之命誓雪家國之讐今日爲王惜庫物而死
死不愧於先王矣太后聞之使召莊宗莊宗懼乃酌
兩卮謝承業曰吾以杯酒之失得罪太后願公飲此
爲吾分過承業不冝飲莊宗入太后使人謝承業明

日太后與莊宗俱過承業第慰勞之。天祐十八年莊宗已許諸將卽皇帝位矣。承業方臥病聞之自太原肩輿而至見莊宗曰大王父子與梁血戰三十年本欲雪家國之讐而復唐之社稷也。今元兇未滅而遽以尊名自居豈王父子初心哉。且梁唐晉之仇賊今王誠能爲天下去大惡復列聖之深讐然後求唐子孫而立之使唐之子孫有在者乎。夫孰敢當此使其無則誰可與王爭者。臣唐家一老奴耳誠願見大王之成功然後退身田里使百官送出洛東門而令路

人指而歎曰此本朝勅使先王時監軍也豈不臣主俱榮哉莊宗不聽承業知不可諫乃仰天大哭曰吾王自取之輿歸太原不食而卒年七十七

○狼賊奄豎趙高

趙高奄人也始皇巡游至沙丘道病爲璽書賜公子扶蘇曰與喪會咸陽而蔡書已封在中車府令趙高行符璽事所未授使者而始皇崩趙高故嘗教胡亥書及獄律令法事胡亥私幸之高乃與公子胡亥丞相李斯陰謀破去始皇所封書賜公子扶蘇者而更

詐爲丞相斯受始皇遺詔立子胡亥爲太子更爲書
賜公子扶蘇蒙恬死行遂從直道至咸陽發喪胡亥
襲位爲皇帝趙高爲郎中令二世乃陰與趙高謀曰
大臣不服官吏尚強恐諸公子欲與我爭奈何高曰
臣固願言而未敢也先帝大臣皆累世名貴人也積
功勞相傳久矣今高素小賤陛下幸稱舉今在位管
中事大臣鞅鞅特以貌從臣其心實不服今可因此
時按郡縣守尉有罪者誅之上以振威天下下以除
去上生平所不可者則上下集而國安矣二世曰善

乃行誅大臣及諸公子以罪過相連逮者不可勝數而六公子一時戮死於社公子將閭兄弟三人囚於內宮皆流涕拔劍自殺宗室振恐羣臣諫者以爲誹謗用法益刻於是戍卒陳勝等皆起趙高說二世曰先帝臨制天下久故羣臣不敢爲非今陛下富於春秋初卽位奈何與公卿廷決事事卽有誤示羣臣短也天子稱朕固不聞聲於是二世常居禁中使高決諸事公卿希得朝見盜賊益多右丞相去疾左丞相斯將軍劫進諫三世下去疾斯劫吏案罪去疾劫自

殺斯卒囚就五刑三年趙高爲丞相竟案李斯殺之
八月趙高欲爲亂恐羣臣不聽乃先設驗持鹿獻於
二世曰馬也二世笑曰丞相誤耶謂鹿爲馬問左右
或默或言馬以阿順趙高或言鹿者高因陰中以法
高前數言關中盜無能爲以項羽虜秦將王離等而
前章邯等軍數却燕趙齊楚韓魏皆立爲王自關以
東大抵盡畔秦吏聽諸侯諸侯咸率其衆西鄉沛公
將數萬人已屠武關使人私於高高恐二世怒誅及
其身乃謝病不朝見二世夢白虎齧其左驂馬殺之

心不樂。問占夢卜曰：涇水爲祟。二世乃齋於望夷宮。欲祠涇，使使責讓高以盜賊事。高懼，乃陰與其婿咸陽令閻樂，其弟趙成謀詐爲有大賊，令樂召吏發卒千餘人，至望夷宮殿門，縛衛令僕射曰：賊入此，何不_止。衛令曰：周廬設卒甚謹，安得賊？樂遂斬衛令，直將吏入，行射。郎宦者大驚，或走，或格格者輒死。閻樂前卽二世，數曰：足下驕恣，誅殺無道，天下共畔足下，足下其自爲計。二世曰：丞相可得見否？樂曰：不可。二世曰：吾願得一郡爲王，勿許。又曰：願爲萬戶侯，勿許。曰：

願與妻子爲黔首比諸公子閻樂曰臣受命於丞相
爲天下誅足下足下雖多言臣不敢報麾其兵進二
世自殺閻樂歸報趙高高乃悉召諸大臣公子告以
誅二世之狀曰秦故王國始皇君天下故稱帝今六
國復自立秦地益小乃以空名爲帝不可宜爲王如
故便立二世之兄子公子嬰爲秦王以黔首葬二世
令子嬰齋當廟見受玉璽齋五日子嬰與其子二人
謀曰丞相高殺二世恐羣臣誅之乃佯以義立我聞
趙高乃與楚約滅秦宗室而王關中今使我齋見廟

此欲因廟中殺我我稱病不行丞相必自來來則殺之
之高使人請子嬰數輩子嬰不行高果自往曰宗廟
重事王奈何不行子嬰遂刺殺高於齋宮夷高二族
以徇子嬰爲秦王四十六日降沛公至項籍殺之

○固寵宦侍石顯

石顯字君房與弘恭皆少坐法腐刑爲中黃門漢初
諸侍中皆用士人自武帝遊宴後庭始以宦者代士
人出入命令至宣帝時任中書官恭明習法令故事
善爲請奏能稱其職元帝卽位數年恭死顯代爲中

書令是時元帝被病不親政事方隆好於音樂以顯
久典事中人無外黨精專可信遂委以政事無大小
因顯白決貴幸傾朝廷自初元中譖殺前將軍蕭望
之周堪劉更生廢錮不用後大中大夫張猛魏郡太
守京房御史中丞陳咸待詔賈捐之皆嘗奏封事或
召見言顯短顯求索其臯房捐之棄市猛自殺於公
車咸抵臯髡爲城旦及鄭令蘇建得顯私書奏之後
以他事論建次自是公卿以下畏顯重足一迹顯與
中書僕射牟綏少府五鹿充宗結爲黨友諸附倚者

皆得寵位。民歌之曰：牢邪、石邪、五鹿客邪、印何累累、綬若若邪？言其兼官據勢也。顯見左將軍馮奉世父子爲公卿著名，女又爲昭儀，在內心欲附之，薦言昭儀兄謂者遂修敕，宣侍帷幄。天子召見，遂請問言事。上聞遂言顯顓權，大怒，罷遂歸。其後御史大夫缺，羣臣皆舉遂兄大鴻臚野王行能第一。天子以問顯，顯曰：「九卿無出野王右者。」然野王親昭儀兄，臣恐後世必以陛下度越衆賢，私後宮以爲三公。上曰：「善。」乃廢不用。顯內自知擅權專柄，恐天子一旦納用左右耳。

間已乃時歸誠取一言以爲驗顯嘗使至諸官有
所徵發顯先自白恐後漏盡宮門閉請使詔吏開門
上許之顯故投夜還稱詔開門入後果有人上書告
顯顯命矯詔開宮門天子聞之笑以其書示顯顯因
泣曰陛下過私小臣屬任以事羣下無不嫉妬欲陷
害臣者事類如此惟獨明主知之愚臣微賤誠不能
以一軀稱快萬衆臣願歸樞機職受後宮掃除之役
唯陛下哀憐財幸以此全活小臣天子以爲然而怜
之數勞勉顯加厚賞顯聞衆句句言已殺前將軍蕭

望之望之當世名儒顯恐天下學士矜已時明經著節士瑯琊貢禹爲諫議大夫顯因薦禹天子歷位九卿至御史大夫禮事之甚備議者於是稱顯以爲實未嘗妬譖望之也元帝崩成帝卽位顯失倚離權數月丞相御史條奏顯舊惡顯與妻子徙歸故郡憂懣不食道病歿諸所交結以顯爲官皆廢罷少府五鹿充宗左遷玄菟太守御史中丞伊嘉爲鴈門都尉長安謹曰伊徙鴈鹿徙菟去年與陳實無賈

○恃恩宦官單超等五侯

桓帝初，趙典、徐璜、貝瑗爲中常侍，左悺、唐衡爲小黃門。史初，梁冀兩妹爲順、桓二帝皇后。冀代父商爲大將軍，再世權威，威振天下。冀自殺，李固、杜喬等驕橫益甚。皇后乘勢忌恣，多行鴆毒。帝逼畏日久，會皇后崩，帝因如廁，獨呼衡問左右與外舍不相得者。衡對曰：「單超、左悺、徐璜、貝瑗常私忿疾外舍，放橫口不敢道。於是帝呼超、悺入室，謂曰：『梁將軍專國，逼脅外內，公卿以下從其風旨，今欲誅之，何如？』超等對曰：『奸賊當誅久矣，但恐陛下中復狐疑耳。』帝曰：『奸臣脅國，當

伏其罪有何疑乎帝於是遂與五人定議收冀及宗親黨與悉誅之。宦衡遷中常侍封超等爲列侯。五人同日封。故世謂之五侯。及超病卒賜東園秘器。其四侯轉橫天下爲之語曰左回天貝獨坐徐臥虎唐兩墮璜。兄子宣爲下邳令暴虐尤甚。先是求故汝南太守下邳李嵩女不能得及到縣遂將吏卒至嵩家載其女歸戲射殺之。汝南黃浮爲東海相收宣家屬無少長悉收拷案宣罪棄市暴其尸以示百姓璜訴於帝帝大怒浮坐髡鉗輸作於是五侯宗族賓客滋爲

倉廩殆遍天下矣民不堪命始起而爲寇賊八年司隸校尉韓演因奏愴罪惡及其兄太僕南鄉侯稱愴稱皆自殺演又奏瑗兄沛相恭賊罪徵詣廷尉瑗貶爲都鄉侯卒於家

○結恨宦侍曹節王甫

曹節桓帝時遷中常侍建寧元年持節將中黃門虎賁羽林千人北迎靈帝陪乘入宮及卽位以定策封長安鄉侯時竇太后臨朝后父大將軍武與太傅陳蕃謀誅中官節與長樂五官史朱瑀等十七人共矯

詔以長樂食監王甫爲黃門令將兵誅武蕃等熹平
元年竇太后崩宦者積怨竇氏以衣車載太后尸置
城南市舍數日節等欲別葬太后詔公卿大會朝堂
令中常侍趙忠監議太尉李咸時病扶輿而起擣椒
自隨謂妻子曰若太后不得配食桓帝吾不生還矣
時議者數百人各瞻望莫肯先言趙忠曰議當時定
廷尉陳球曰皇太后以盛德夏家毋臨天下宜配先
帝無疑忠笑而言曰陳廷尉立便操筆球卽下議曰
皇太后在椒房有聰明母儀之德遭時不之援立聖

明承繼宗廟功烈至重先帝晏駕因遇大獄遷居空
宮不幸早世家雖獲罪事非太后今若別葬誠失天
下之望李咸曰臣謂宜爾誠與意合於是公卿以下
好公卿皆從球議曹節王甫以爲梁后家犯惡逆別葬懿陵
武帝黜廢衛后而以李夫人配享今竇氏罪深不得
合葬先帝李咸復上疏曰臣伏惟章德竇后虐害恭
懷安思閭后家犯惡逆而和帝無異葬之議順朝無
貶降之文至於衛后孝武皇帝身所廢棄不可以爲
比今長樂太后尊號在身親嘗稱制且援立聖明光

隆皇祚太后以陛下爲子陛下豈得不以太后爲母子無黜母臣無貶君宜合葬宣陵一如舊制帝省奏從之未幾有人書朱雀闕言天下大亂曹節王甫幽殺太后常侍侯覽多殺黨人公卿尸祿無有忠言者於是詔司隸校尉劉猛逐捕猛以誹書言直不肖急捕猛坐左轉以御史中丞段熲代猛熲以他事奏猛抵罪而節甫父子弟爲卿校牧守令長者所在貪暴百姓不堪矣甫養子吉爲沛相尤殘酷凡殺人皆磔尸車上隨其罪目宣示屬縣夏月腐爛則以繩連

其骨周徧一郡乃止尚書令陽球常拊髀發憤曰若
陽球作司隸此曹子安得容乎旣而球果遷司隸甫
使門生於京兆界辜權官財物七千餘萬時甫休沐
里舍頗方以日食自効球詣闕謝恩因奏甫頗及中
常侍淳于登袁赦封最等罪惡悉收甫頗等下洛陽
獄及甫子永樂少府萌沛相吉球自臨考甫等五毒
備極萌嘗先爲司隸乃謂球曰父子旣當伏誅亦以
先後之義少以楚毒假借老父球曰爾罪惡無狀乃
欲論先後求假借耶筆朴交至父子悉歿杖下頗自

殺乃僵磔甫屍於夏城門大署榜曰賊臣王甫盡沒

入其財產妻子皆徙北球何說既誅甫欲以次表曹節等

曹節等皆不敢出沐會順帝虞貴人葬百官會喪還

曹節見磔甫尸道次慨然收淚曰我曹可自相食何

空使大舐其汁乎卽直入省白帝曰陽球故酷暴吏

愆過之人好爲妄作不宜使在司隸帝乃徙球爲衛

尉節勅尚書令召拜不得稽留球被召急因求見帝

叩頭曰臣無清高之行橫蒙鷹犬之任前雖誅王甫

段熲蓋狐狸下醜未足宣示天下願假臣一月必令

豺狼鳴梟各服其辜叩頭流血殿上呵叱曰衛尉扞
詔邪乃拜受命于是曹節朱瑀等權勢復盛球下獄
死而節領尚書令光和四年乃卒

○報怨庵人侯覽

侯覽桓帝初爲中常侍又託以與議誅梁冀功進封
高鄉侯建寧二年覽喪母還家大起塋冢督郵張儉
因舉奏覽貪侈奢縱前後侵奪人宅三百餘所田百
一十八頃起立第宅僭類宮省又豫作壽冢石槨雙
闕高廡百尺破人居室發掘墳墓虜奪良人妻略婦

女請誅之而覽伺候遮截竟不得上儉遂破覽家宅籍沒貲財具言其罪覽亦遂誣儉爲鉤黨及故長樂少府李膺太僕杜密等皆夷滅之遂代曹節領長樂太僕熹平元年有司舉奏覽專權驕奢策收印綬自殺卓吾曰黨錮之禍起於張儉一人諸賢盡夷宗社遂傾而儉獨存顏何厚也

○固寵宦侍張議趙忠

靈帝時張議趙忠並遷中常侍曹節歿後忠領大長秋與議及段珪等十二人皆封侯貴寵父兄弟布

列州郡所在貪殘爲人蠹害黃巾旣作盜賊糜沸郡
中張鈞上書言宜斬十常侍懸頭南郊以謝百姓遣
使者布告天下可不須師旅而賊寇自消天子以鈞
章示讓等皆免冠徒跣頓首詔使廷尉侍御史考爲
張角道者御史承讓等旨誣奏鈞學黃巾道收掠灰
獄中而讓等實多與張角交通後中常侍封謂事發
覺受誅帝因怒詰讓等曰汝曹嘗言黨人欲爲不軌
皆令禁錮或有伏誅今黨人更爲國用汝曹反與張
角通爲可斬未皆叩頭云故中常侍王甫侯覽所爲

好貨

卷三十一

帝乃止。明年，南宮災，讓忠等說帝歛天下田畝稅十錢以修宮室。刺史二千石及茂才孝廉遷除皆責助軍修宮錢。富之官者皆先至西園諧價，然後得去。有錢不畢者，或至自殺。其不之官者，皆迫遣之。又造萬金堂於西園，引司農金錢繒帛，仞積其中。帝本侯家，宿貧，每歎桓帝不能作家居，故聚為私藏。初開西邸賣官，二千石二千萬，四百石四百萬。其以德次應選者，便、五、半之。令長隨縣豐約有賈，富者先入，貧者到官倍輸。又私令左右賣公卿公千萬，卿五百萬，復藏寄小賈。

有、取、德、行、者

門常侍錢各數千萬及上崩中軍校尉袁紹說大將軍何進誅中官謀泄讓忠等因其殺進而紹勒兵斬忠捕宦官無少長悉斬之讓等數十人劫質天子走河上追急讓等悲哭辭曰臣等殄滅天下亂矣惟陛下自愛皆投河而死

○恃功奄豎李輔國

李輔國年四十以閹奴事高力士後得侍東宮與陳玄禮等謀誅楊國忠勸太子分玄宗麾下兵趨朔方以圖興復太子遂卽帝位及還京拜殿中監封成國

公輔國遂專掌禁兵權。在主右矣。時太上居興慶宮。宮有長慶樓。樓南俯大道。父老過者皆拜舞然後去。輔國言於上曰。太上皇居近市。交通外人。玄禮力士等將不利陛下。帝泣曰。聖皇慈仁。豈容有此。對曰。上皇固無此。其如羣小何。陛下爲天下主。當爲社稷大計。且興慶垣墉淺露。非至尊所宜。大內深嚴。奉迎居之。與彼何異。上不聽。輔國又令六軍將士號哭叩頭。請迎上皇居西內。帝泣不應。輔國懼。會帝屬疾。卽詐言皇帝請太上皇按行宮中。太上皇至睿武門。忽見

射生官五百遮道不得前太上皇馬驚幾墜輔國以
甲騎數十馳奏曰陛下以興慶宮湫陋奉迎乘輿還
宮中力士厲聲曰五十年太平天子輔國欲何爲者
叱使下馬輔國失轡而呼曰翁不鮮事乃斬一從者
以徇力士向前曰太上皇問將士各好在否可各納
刀呼萬歲將士皆各納刀再拜力士復曰輔國可御
太上皇馬以行輔國乃與力士共執轡御還西內居
甘露殿侍衛數十皆阉老不堪太上皇執力士手曰
微將軍朕且爲兵死鬼矣自是快快不豫至棄天下

云輔國以功遷兵部尚書南省視事既得志乃求爲
宰相寶應元年肅宗寢疾先是張后與輔國表裏顓
權至晚復有隙內射生使程元振黨于輔國上疾篤
后召太子謂曰輔國久典禁兵制勅皆從之出今主
上彌留輔國陰與程元振謀作亂不可不誅太子泣
曰如貨二人皆陛下勲舊今不請而誅必致震驚恐不能
堪也太子出后更召越王係謀之元振知之密告輔
國輔國卽伏兵凌霄門捕越王等囚之而殺后代宗
立輔國等以有定策功愈跋扈難制至謂帝曰大家

帝坐宮中。外事聽老奴處決。帝矍然欲剪除。而憚其握兵。因尊爲尚父。事無大小皆關白。輔國羣臣出入皆先詣輔國。輔國頗自安。未幾程元振欲奪之權。請上漸加禁制。乃以左武衛大將軍彭體盈代爲閑廐羣牧苑內營田五坊等使。以右武衛大將軍藥子昂代判元帥行軍司馬。賜輔國大第於外。輔國始惘然表乞解官。有詔進封博陸郡王。仍爲司空尚父。朝朔望自輔國徙太上皇。天下疾之。帝在東宮。積不能平。既嗣位。不欲顯誅。遣人夜刺殺之。

此河舉動

○恃功奄豎程元振

程元振少以宦官直內侍省。張皇后謀立越王。元振見太子發其奸。與李輔國助討。難立太子。是爲代宗。代宗立。元振封保定縣侯。遷驃騎大將軍。邠國公。盡總禁兵。不踰歲。權震天下。名在輔國之右。軍中呼爲十郎焉。宰臣裴冕與元振忤。乃發小吏贓私。貶冕施州。來瑱初在襄陽。元振有所請託。不從。及爲相。元振譖瑒言涉不順。與賊合謀。坐削官。流播州。賜歿。同華節度使李懷讓被搆。自殺。元振又惡李光弼。數媒竭

以疑之故方帥繇是攜繇廣德初吐蕃党項內侵詔
集天下兵無一至者虜扣便橋帝倉惶出走陝京師
陷賊剽府庫焚閭閻太常博士翰林待詔柳伋上疏
曰犬戎以數萬衆犯闕度隴歷秦渭掠邠涇不血刃
而入京師謀臣不奮一言武士不力一戰提卒叫呼
劫宮闈焚陵寢此將帥叛陛下也自朝義之滅陛下
以爲智力所能故䟽元功委近習日引月長以成大
禍羣臣在廷無一犯顏回慮者此公卿叛陛下也陛
下始出都百姓填然奪府庫相殺戮此三輔叛陛下

也。自十月朔召諸道兵，盡四十日，無隻輪入關者。此四方叛陛下也。內外離叛，皆恨陛下遠賢良，任宦豎，離間將相，必欲存宗廟社稷，獨斬元振首，馳告天下。如此而兵不至，人不感，天下不服，請赤臣族以謝。疏聞，帝乃下詔，盡削元振官爵，放歸。帝還京，元振自三原衣婦人衣，私入京師，舍司農卿陳景銓家，欲圖不軌。御史劾，案長流灤州。景銓貶新興尉。元振行至江陵，死。

○特恩宦豎魚朝恩

至德初九節度圍賊相州以朝恩爲觀軍容宣慰處
置使觀軍容使自朝恩始寶應中還屯陝代宗避吐
蕃東走衛兵離散朝恩悉軍奉迎帝德之更號天下
觀軍容宣慰處置使專領神策軍是時郭子儀有定
天下之功朝恩媚之乘相州敗醜爲詆讚肅宗雖不
納其語然猶罷子儀兵畱京師故代宗立與程元振
一口加毀帝未及寤子儀憂甚俄而吐蕃陷京師卒
用子儀王室再安朝恩內慙乃勸帝徙洛陽欲遠戎
狄百僚在廷朝恩從十餘人持兵出曰虜數犯都甸

欲幸洛云何宰相未對有近臣折曰敕使反邪今屯兵足以悍寇何遽脅天子棄宗廟爲朝恩色沮而子儀亦謂不可乃止朝恩怙貴誕辭每折愧坐人欲出其上時元載爲相雖強辯亦拱默聽之唯禮部郎中相里造往返不屈朝恩謀將易執政會百官于都堂言宰相和元氣輯羣生今水旱不時饋運困竭天子臥不安席宰相宜須遐避賢路坐皆失色獨造徙坐從之因曰陰陽不和五谷踴貴皆軍容事宰相何與焉且軍拏不散故天降之沴今京師無事六軍自足

而又屯十萬饋糧所以不繼也百司無稍食皆軍容
爲之宰相行文書而已何所歸罪耶朝恩拂衣去曰
南衙朋黨且害我會釋菜朝恩執易升坐百官咸在
朝恩言鼎有覆餗象以侵宰相王縉怒元載怡然朝
恩曰怒者常情笑者不可測也載銜之而未發會朝
恩有養子令徽者尚幼爲內給使服綠與同列爭忿
歸白朝恩朝恩見帝曰臣之子位下願得金紫在班
列上帝未咎有司已奉紫服於前令徽稱謝矣帝笑
曰小兒章服大稱帝以故不悅元載乃用左散騎常

侍崔昭尹京兆厚以財結其黨皇甫溫周皓溫方屯
陝而皓爲射生將自是朝恩隱謀與語悉爲帝知帝
倚載決除之懼不克載曰陛下第專屬臣必濟朝恩
入殿嘗從武士百人自衛皓統之而溫握兵在外載
乃徙鳳翔尹李抱玉節度山南西道以溫代節度鳳
翔陽重其權寔內溫以自助載又議析鳳翔之郿與
京兆以鄠鵠屋及鳳翔之寶雞與抱玉而以興平武
功鳳翔之扶風天興與神策軍朝恩利其土地封殖
不知爲虞也載畱溫京師未卽遣約與皓共誅朝恩

謀定以聞帝曰善圖之勿反受福會寒食宴禁中朝
恩素肥每乘小車入宮省帝聞車聲危坐以見之朝
恩至帝責其異圖朝恩尚悻傲強辯皓與左右掄而
縊殺之卓吾曰元載亦有權術可用然代宗初失國
倚恃魚朝恩實得朝恩力而卒受制於朝恩及用元
載力誅魚朝恩實得元載力而卒受制於元載然則
爲人主者亦難矣不用不得用之又不得是以雖郭
令公心事如青天白日人主難遽信也而況如今公
者古今天下又最希鮮者乎吁非大聖人安能當九

五之位與

○悖逆奄豎仇士良

仇士良憲宗時數任內外五坊使按鷹畿內至文宗
與李訓欲殺王守澄以士良素與守澄有隙故擢良
爲左神策軍中尉已而訓謀悉誅中官士良知之乃
與右中尉魚弘志挾帝還宮相臣王涯舒元興等就
縛士良乃脅令自陳反狀以示于朝因縱兵捕殺無
輕重皆死公卿半空事平加特進右驍衛大將軍弘
志右衛上將軍兼中尉李石輔政稜稜有風岸士良

用不著

使賊刺石於親仁里馬逸而免不懼辭位去澤潞蜀
從諫本與訓約誅鄭注及訓死憤士良得志乃上書
言王涯等八人皆宿儒大臣今大戮所加已不可追
而名曰逆賊使之含憤九泉且宦人根黨蔓延在內
臣欲面陳恐橫遭戮害謹修封疆繕甲兵爲陛下腹
心如奸臣難制誓以死清君側書聞士良沮恐卽進
從諫檢校司徒從諫復言臣所陳係國大體可聽則
宜洗宥涯等罪不可聽則賞不宜妄出安有死冤不
申而生者荷祿累上書暴指士良等罪逆自是文宗

鬱鬱不樂兩軍毬獵晏會絕矣開成四年帝苦風痺
少間召直學士周墀問曰據爾所况朕何如主墀再
拜曰陛下堯舜主也帝曰所以問者謂與周赧漢獻
孰愈耳赧獻受制疆臣好貨今朕受制家奴由此觀之不
如遠矣因泣下墀亦伏地而泣始樞密使劉弘逸薛
季稜宰相李瑀楊嗣復以帝有疾不朝謀奉太子監
國士良與弘志卽矯詔立潁王爲太弟武宗已立士
良封楚國公弘志韓國公俄而瑀嗣復罷去弘逸季
稜誅死賴武宗明斷雖士良有援立功內實嫌之陽

示尊寧會昌三年士良罷爲尚侍監知省事請老而卒士良之去也中人舉送還第士良謝曰諸君善事天子能聽老夫一語乎天子不可令閒暇閒暇必觀書接見儒臣納諫諍減玩好省游幸吾屬恩幸薄矣爲諸君計莫若殖財貨盛鷹馬日以韃靼聲色蠱惑上心使不知息則必斥經術閤外事而後權柄在我也以故士良擅專二十餘年殺二王一妃四宰相竟保首領以死云始士良弘志憤文宗與李訓共謀誅已屢欲廢帝是日崔慎由爲翰林學士直夜未半有

中使召入至秘殿見士良等坐堂上謂慎由曰上不
豫已久自卽位政令多荒闕皇太后有制更立嗣君
學士當作詔慎由驚曰上高明之德在天下安可輕
議慎由親族中表千人兄弟羣從且三百何敢與覆
族事耶士良等默然久乃啟後戶引至小殿帝在焉
士良等歷階而上數帝過失帝俛首旣而士良指帝
曰不爲學士不得更坐此乃逆慎由出戒曰毋泄禍
及爾宗慎由記其事藏箱枕間時人莫知將沒以授
其子胤故胤惡中官終討除之唐宣宗八年召翰林

學士韋澳託以論詩屏左右與之語曰近日外間謂
內侍權勢何如對曰陛下威斷非前朝之比宣宗閉
目搔首曰全未全未尚畏之在卿謂策將安出對曰
若與外廷議之恐有太和之變不若就其中擇有才
識者與之謀宣宗曰此乃末策朕已試之矣白衣黃
衣綠至衣緋皆知感恩纔衣紫則相與爲一矣宣宗
又嘗與令狐綯謀盡誅宦官綯密奏曰但有罪勿赦
有缺勿補自然漸耗至於盡矣宦者竊見其奏由是
益與朝士相惡南北司如水火然昭宗時悉以軍國

事委崔胤時胤與中書舍人韓妙人偓定計誅劉季述昭宗反正胤又欲盡除諸宦官偓屢諫曰事禁太甚此輩亦不可全無恐其黨迫切更生他變胤不從昭宗獨召偓問曰敕使中爲惡者如林何以處之對曰陛下擇其尤無良者數人明示其罪寘之於法而無論其餘則人人自安矣臣謂帝王之道當以厚重鎮之公正御之王至於瑣細機巧不可用也此機生則彼機應所謂理系而勞之也昭宗深以爲然已而偓爲全忠所惡貶濮州司馬帝執其手流涕曰我左右無人

宋天祐二年復名爲學士還故官。偃不敢入朝。挾其族南。依王審知而卒。又按唐自肅宗張后之後未嘗有正位長秋者。史所載皇后皆追贈其太后。則皆所生子爲帝而奉上尊號者也。憲宗以郭汾陽孫女爲妃。旣爲令族。又有淑德。可以正位矣。乃以其宗強。恐旣立之後。後宮不得進。遂終身爲妃。自後人主皆不立后。然文宗崩旣有太子仇士良等廢之而立武宗。武宗崩旣有皇子。諸宦官廢之而立宣宗。宣宗崩遺命立夔王王宗實等廢之而立懿宗。雖當時中人專

權今古所無然亦因椒房虛位宮闈無主所謂皇子者皆無寵無威之人故上官彌留之際宰輔既隔在外庭中人遂得以肆行無忌顯違詔旨私立所厚而莫可禁止也

○嬖幸二

○嬖幸鄧通

通蜀郡人以濯船爲黃頭郎文帝嘗夢欲上天不能有一黃頭郎推上天顧見其衣尻帶後穿覺而之漸臺以夢中陰目求推者郎見鄧通其衣後穿夢中所見也召問其姓名姓鄧名通鄧猶登也文帝甚悅尊幸之日異通亦厚謹不好外交雖賜洗沐不欲出於是文帝時問如通家戲然通無他技能獨自護身以媚上而已上使相人者相通曰當貧餓次上曰能富

通者我何說貧於是賜通蜀嚴道銅山得自鑄錢鄧

氏錢布天下矣文帝嘗病癰通嘗爲上嗽吮之上不

樂從容問曰天下誰最愛我者平通曰宜莫若太子

太子入問疾上使太子齧癰太子齧癰而色難之已

而聞通嘗爲上齧之太子慙繇是心恨通及文帝崩

景帝立鄧通免家居居無何人有告通盜出徼外鑄

錢下吏驗問頗有遂竟案盡沒入之通家尚負責數

鉅萬長公主賜鄧通吏輒隨沒入之一簪不得著身

於是長公主乃令假衣食竟不得名一錢寄於人家

嗟夫景帝視父如冤仇雖與以天下如應得物也然則世局嘗有父子之親哉徒有勢利耳矣

○董賢

賢雲陽人哀帝立賢以太子舍人爲郎賢傳漏在殿下爲人美麗自喜哀帝望見說其儀貌識而問之曰是舍人董賢邪因引上與語拜爲黃門郎繇是始幸爲駙馬都尉侍中出則參乘入御左右旬月間賞賜累鉅萬常與上臥起嘗晝寢偏籍上裊上欲起賢未覺不欲動賢乃斷裊而起其恩愛至此賢亦性柔和

便辟善爲媚以自固每賜洗沐不肖出常畱中視醫藥上以賢難歸詔令賢妻得通引籍殿中止賢廬若吏妻子居官寺舍又名賢女弟以爲昭儀位次皇后更名其舍爲椒風以配椒房云昭儀及賢與妻且夕上下並侍左右賞賜昭儀及賢妻亦各千萬數遷賢父恭爲少府賜爵關內侯又以賢妻父爲將作大匠弟爲執金吾詔將作大匠爲賢起大第北闕下重殿洞門木土之功窮極技巧柱檻衣以綈錦下至賢家僮僕皆受上賜及武庫禁兵上方珍寶其選物上第

盡在董氏而乘輿所服乃其副也及至東園秘器
襦玉押襖以賜賢無不備具又令將作爲賢起冢營
義陵苑內爲便房剛栢題奏外爲微道周垣數里門
闕杳忽甚盛上欲侯賢而未有緣會待詔孫寵息夫
躬等告東平王雲后謁祠祀祝詛下有司治皆伏其
辜上於是令躬寵爲因賢告東平事者乃以其功下
詔封賢爲高安侯夫躬宜陵侯寵方陽侯丞相王嘉
內疑東平事寃甚惡躬等數諫爭以賢爲亂國制度
嘉竟坐言事下獄死上初卽位祖母傅太后母丁太

后皆在、兩家先貴、傅太后從弟喜、及上舅丁明皆相、繼爲大司馬、頗害賢寵、及丞相王嘉、以明甚憐之上、肅重賢欲極其位、而恨明如此、遂冊免明、以賢代明、爲大司馬、衛將軍、冊曰、朕惟稽古、建爾于公、以爲漢輔、往悉爾心、匡正庶事、允執其中、是時賢年二十二、雖爲三公、常給事中、弟寬信代賢爲駙馬都尉、董氏親屬皆侍中、諸曹奉朝請寵在下、傅之右矣、初丞相孔光爲御史大夫、時賢父恭爲御史、事光、及賢爲大司馬、與光並爲三公、上欲令賢私過光、光知上欲尊

○方士三

○方士李少君少翁謬忌樂大公孫卿

武帝時李少君以祠竈穀道却老方見上上尊之少君自謂七十能使物却老常餘金錢衣食人皆以爲不治產業而饒給又不知其何所人愈信爭事之少君善爲巧發奇中嘗從武安侯飲坐中有九十餘老人少君乃言與其大父游射處老人爲兒時從其大父行識其處一坐皆驚上有故銅器少君曰此器齊桓公十年陳於桓寢已而按其刻果齊桓公器宮中

盡駭以少君爲神數百歲人也少君言上曰祠竈則致物而丹砂可化爲黃金黃金成以爲飲器則益壽而海中蓬萊仙者乃可見見之以封禪則不歿黃帝是也臣嘗游海上見安期生安期生食臣棗大如瓜安期生仙者通蓬萊中合則見人不合則隱於是天子始親祠竈而遣方士入海求蓬萊安期生之屬而事化丹砂諸藥爲黃金矣居久之李少君病歿天子以爲化去不歿而使史寬舒受其方求蓬萊安期生莫能得而海上燕齊怪迂之方士多更來言神事矣

亳人謬忌奏祠太一方曰天神貴者太一太一佐曰
五帝古者以春秋祭太一東南郊用太牢具七日爲
壇開八通之鬼道於是天子令太祝立其祠長安東
南郊常奉祠如忌方焉其明年齊人少翁以鬼神方
見上上有所幸王夫人卒少翁以方術蓋夜致王夫
人及竈鬼之貌云天子自帷中望見焉於是乃拜少
翁爲文成將軍以客禮禮之文成言曰上卽欲與神
通宮室被服非象神神物不至乃作畫雲氣車及各
以勝日駕車辟惡鬼又作甘泉宮中爲臺室畫天地

太一諸鬼神而置祭具以致天神居歲餘其方益衰神不至乃爲帛書以飯牛佯不知言曰此牛腹中有奇殺視得書書言甚怪天子識其手書於是誅文成將軍隱之其後則又作柏梁銅柱承露仙人掌之屬矣文成灰明年天子病鼎湖甚巫醫無所不致不愈使人問神君神君言曰天子無憂病病少愈強與我會甘泉於是病愈遂起幸甘泉置壽宮神君壽宮神君非可得見聞其音音與人言等時去時來則風肅然居室帷中時晝言然常以夜天子被然後入因張

如脫屣耳。乃拜卿爲郎，使東候神於太一。上遂郊雍，至隴西，西登崆峒，幸甘泉，而五利將軍使不敢入海之太山祠，上使人隨驗實毋所見。五利妄言見其師，其方盡多不讐。上乃誅五利。其冬，公孫卿候神河南，言見仙人跡緱氏城上，有物如雉，往來城上。天子親幸緱氏城，視跡，問卿得毋效文成。五利乎？卿曰：「仙者非有求人主，人主者求之。其道非少寬假，神不來。於是郡國各除道，繕治宮觀，名山神祠，所以望幸也。其春，上有嬖臣李延年以好音見。上善之，曰：『民間祠尚』

有鼓舞樂。今郊祀而無樂，豈稱乎？或曰：太帝使素女鼓五十弦瑟，悲帝禁不止，故破其瑟爲二十五弦。於是上始用樂舞，益召歌兒，作二十五弦及笙篴瑟。自此起，其來冬乃遂北巡朔方，還祭黃帝冢，橋山上曰：吾聞黃帝不歿，今有冢，何也？或對曰：黃帝已仙上天，羣臣葬其衣冠。上自得寶鼎，與公卿諸生議封禪，封禪用命，曠絕莫知其儀。禮齊人丁公年九十餘曰：封禪者，古不歿之名也。秦皇帝不得上封，陛下必欲上，請上，卽無風雨，遂上封矣。天子旣聞公孫卿及方士

言黃帝以上封禪皆致怪物與神通欲放黃帝以上
接神仙蓬萊士高世比德於九皇而頗采儒術以文
之羣儒既已不能辨明封禪事於是上盡罷諸儒不
用遂東幸緱氏禮登中嶽太室從官在山下聞若有
言萬歲者東上太山太山之草木葉未生乃令人上
石立之太山巔上遂東巡海上行禮祠八神齊人之
上䟽言神怪奇方者以萬數然無驗者公孫卿至東
萊言夜見大人長數丈就之則不見見其跡甚大類
禽獸云羣臣有言見一老父牽狗言吾欲見巨公已

忽不見上見大跡未信及羣臣有言老父則大以爲
仙人也宿留海上予方士傳車及間使求神仙人以
千數四月還至奉高上念諸儒及方士言封禪人殊
不經難施行天子獨與侍中奉車子侯上太山明日
下陰道旣已封泰山無風雨災而方士更言蓬萊諸
神若將可得於是上欣然幾遇之乃復東至海上望
焉奉車子侯暴病一日死其春公孫卿言見神人東
萊山若云欲見天子天子於是幸緱氏城拜卿爲中
大夫遂至東萊宿留之數日無所見見大人跡公孫

曰仙人可見而上往常遽以故不見今陛下可爲
觀如緱城置脯棗神人安可致也且仙人好樓居於
是上令長安則作蜚廉桂觀甘泉則作益壽延壽觀
使卿持節設具而候神人乃作通天臺置祠具其下
將招來神仙之屬其明年伐朝鮮夏旱公孫卿曰黃
帝時封則天旱乾封三年上乃下詔曰天旱意乾封
乎其令天下尊祠靈星其後十三歲而還徧於五嶽
四瀆而方士之後祠神入海求蓬萊終無有驗公孫
卿之候神者猶以大人之跡爲觝無其效天子益怠

厭方士之怪迂語然終羈縻不絕冀遇其真者曹植作辨道論曰世有方士吾王悉所招致甘陵有甘始廬江有左慈陽城有卻儉始能行氣道引慈曉房中之術儉善辟穀悉號三百歲卒所以集之於魏國者誠恐斯人之徒接姦宄以欺衆行妖隱以惑民豈欲觀神仙於瀛州求安期於海島釋金輅而履雲輿棄六驥而美飛龍哉自家王與太子及余兄弟咸以爲調笑不信之矣然始等知上遇之有恒奉不過於吏員賞不加於無功海島難得而游六轍難得而佩終

不敢進虛誕之言、出非常之語、余嘗試却儉絕穀、百
日、躬與之寢處、行步起居自若也、夫人不食七日、則
死、而儉乃如是、左慈善修房內之術、然自非有志至
精、莫能行也、甘始者、老而有少容、自詣術士、咸其歸
之、然始辭繁寡實、頗有怪言、若遭秦始皇、漢武帝、則
復爲徐市、欒大之徒也、